



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Nepal aser China nati tekümkükba maparen tenzükshiogo

Neeraj Chopra Asian Games nung masayatsü



VOL. XXIII ISSUE NO. 318 (ADOK 318) DIMAPUR AMUNGNÜ (SUNDAY) LUROI (AUGUST) 30, 2026

₹ 5.00

Nagaland nung National Sports Day amung

Kohima, August 29, 2026 (TYO): Nagaland nung Honibarnü National Sports Day mungogo aser Chief Minister Neiphiu Rio-i state nung sporting ecosystem tashi aittsü asoshi maneni merangtsü ayongzükogo.

Department of Youth Resources and Sports-i Indira Gandhi Stadium nung sentong ka ayonga agidang saisapongertem aser coach balala nem state level cash awards agütsüogo. Parnoki regional, national aser international jenjang nung takok balala anguba aser shilem agiba ajiteta tetushi agütsüogo.

National Sports Day nung asenoki asen saisapongertemi bendanga agütsüba aser anibelem aremba atema tetushi agütsür ta CM Neiphiu Rio-i ashi.

"Iba anogomung ya Indian hockey player Major Dhyan Chand tasoba anogo bilemteta amunger. Iba anogo nung saisapongba ajiteter aser saisapongertemi bendanga agütsüba atema pelaba metetdaksür" ta Youth

Resources & Sports Department Secretary Anthony Ngullie-i ashi.

Saisapongba ajanga tashi angaba, teamwork, alizüng atongtsü temulungtetba, taremzük aser takok o tamakok anguba agizüktettsü tesayuba agütsür ta Ngullie-i ashi.

Tanü sempet anguba saisapongertemi lanurtem ajungmesotsü aser state o linük asoshi temaba jenjangtem nung shilem agütsü jangratsü ta pai ashi.

Maneni coach temi saisapongertem anitettsü tongti shilem agiba atema pelar. Coach balalai Nagaland nung saisapongbaren tsütsü shilem tajung agia arur aser state asoshi konang bentsür arutsüsa saisaponger aika anitetogo ta Ngullie-isa metetdaksü.

Coaches Award category kübok Pulo Neikha, Sports Coach (Sepaktakraw), aser Deep Kumar, Sports Coach (Pencak Silat) na nem sempet agütsü. Maneni, National Sports Day Athletics Meet 2026 nung takokertem nem tenüngsang agütsü.

Tuli nung citronella distillery unit lapoker

Dimapur, August 29, 2026 (TYO): Tuli Sub-Division nung National Bank for Agriculture and Rural Development (NABARD)-i teyari agüja Community Educational Centre Society (CECS) ajanga citronella distillery ka lapokogo.

Iba citronella distillery ya NABARD Nagaland Regional Office nung General Manager/OIC Pauliankap Bulte-i Tzudikong, Watiyongpang nung lapoktsüogo. Iba mapang Director, CECS Subonenba Longkumer aser District Development Manager (DDM), NABARD Mokokchung Poji na liasü.

NABARD aser CECS ajanga aluyimertem taginüba angatetba aser maongka tasentem bentsür aruba atema tenüngsang agütsür ta Subonenba Longkumer-i ashi.

Nagaland nung citronella maparen ya tang mezüng inyaker aser iba ajanga aluyimer nem tajangzük tulu bentsür arutsü lenmang sadema lir. Iba maparen nung value chain ajunga inyaksüla, tsünüba nungi farm level nung production aser processing o value addition inyaka aluyimertem nem tajangzük ngudaktsütsüla ta pai ashi.

NABARD ajanga rural livelihoods pusema nungiter aser citronella o lemongrass wadang asoshi lenmang tesadem lir ta District Development Manager (DDM), NABARD Poji-i ashi.

Paisa aluyimertem dang maneni citronella tsünütsü,

tangar den shisatsü lemsateptsü aser aromatic plant cultivation inyaktsü ajungmesotsü atema ayongzük.

Iba distillery unit ya shishilembatsü maongka tajung ka lir aser local processing o value addition süa value chain tashi aittsü. NABARD-i maneni iba maparen nung yariteptsü ta Poji-isa ashi. "Iba distillery unit amenokba ya kanga tongtipang aser iba tesem nung aluyimertem asoshi kanga tia taka lir. Aluyimertemi citronella cultivation tuluba inyaka aotsü aser tanga aluyimertem den shisatsü lemsateptsü ayongzük" ta NABARD, Nagaland Regional Office General Manager (OIC) Pauliankap Bulte-i ashi.

Iba sentong nung beneficiaries-i CECS aser NABARD dang pelaba metetdaksü. Aluyimba maparen nung teti nungita yariba atema tenüngsang agütsür aser alu ayimtsü tenzük dang nungi tang tashi yaria aruba atema tenüngsang agütsür ta beneficiaries-isa ashi.

Iba sentong nung Programme Officer, CECS Toshi Aier-i anküp tepela o jembidang NABARD ajanga maneni teyari agütsüba aser tesentaktep ayuba atema pelaba metetdaksü. Paisa aluyimertem aser beneficiaries dang shilem tajung agiba aser maparen balala nung tenangzükba yur yaritepba atema pelaba shisem.

ILP ajanga asen maitsü kümzüka ayutsüla: Dr. Neiphiu Rio



Dimapur, August 29, 2026 (TYO): Inner line pass (ILP) ya regulatory mechanism ka dang masü saka Nagaland tejakleni aotsü aser azükarutsü atema inyaka aodang asen maitsü kümzüka ayuba inyakyim ka asütsüla ta Chief Minister Dr. Neiphiu Rio-i ashi.

August 29, 2026 nü Town Hall Dimapur Bengal Eastern Frontier Regulation (BEFR) Act 1873 indang national seminar nung jembidang CM Rio-i "asen maitsü, ali, sobaliba aser lisopur temetentem kümzüka ayutsüsa ILP policy tajung ka alitsüla" ta ashi.

"Asenoki BEFR 1873 amshia India sensotem aser lisopur Naga nung kümzüka ayutsü aser terenlok aliba den rongsenketzung ajungkettsü asoshi system ka tenzüksüla" ta CM Rio-isa ashi.

Dimapur, Chumoukedima aser Niuland nung ILP benokba anema kija kari Guwahati High Court nung ken o benok. Ajisüaka okadaki district asem nung state sorkari ILP benoktsü lemtetba pusema nungita oshidang agütsü. Iba ya Naga nung asoshi takok tulu lir aser iba ajanga Arlla 371A jangjashitsür ta paisa metetdaksü.

"BEFR 1873 ajanga bendangertemi 'immovable properties' malitettsü tejangja lateta lir. Asenoki iba BEFR ya kanga junga bentsüla kechiyong asenoki tim mesüi beshira mesüra tangar nem timtem agütsütsü merangra asenoki dang lendong ajurutsü" ta CM Rio-i tekümdangtsü olen ka ashi.

"Asen samanirtemi 16 Point Agreement nung sign sütepdang Nagaland nung Bengal Regulation, Bengal Eastern Frontier Regulation Act of 1873 maneni bentsütsü ta onük 16 buba lateta ayu" ta paisa ashi.

"Arlla 371A ajanga sobaliba ozüngtem, ali aser ali rongsen aser tamangba yimsü mesüra inyaksangshi kümzüka ayur anungji asenoki itemji temulung nung ayutsüla, kümzüksüla saka tim mesüi mamshitsüla" ta CM Dr. Rio-isa metetdaksü.

Tanü sentong nung Naga Students' Federation (NSF) Inner Line Regulation Commission (ILRC) ajanga CM Dr. Rio nem tezüluba ka agütsü aser iba nung Nagaland state atema Autonomous Inner Line Regulation Commission tentettsü shia lir.

Nagaland sorkari autonomous Nagaland Inner Line Regulation

Commission ka tentettsü aser Regulation of 1873 akangakanga bentsütsü rules & regulations latettsü tashi ajunga agütsütsüla ta NSF-i shidi nung shia lir.

Iba Commission nem Inner Line Regulation tiptema inyaka aotsü aser lemtettem agütsü atema tashi agütsütsüla ta parnokisa ashi.

Nagaland sorkari lisopur temetentem kümzüka ayutsü atema tenangzükba agia inyaka aruba atema tenüngsang agütsür aser iba maparen nung amalitepa yaritsü mulunga lir ta NSF ILRC-isa metetdaksü.

"Constitution nung Arlla 29 ajanga sobaliba mesüra loktiliba shiai pei oshi, zülü aser sobaliba wazüka ayutsü temeten agütsür. Iba ya linük nung senso shia nem agütsüba fundamental right ka lir aser iba nung Naga nung dena lir" ta Supreme Court of India nung Senior Advocate Prashan Bushan-i ashi.

Constitution ajanga ano temeten ka agütsübaji India litsü nung sadema senzütsüba temeten lir. India senso shia, Naga nung mesüra tanga state tem nung alirtem süang India litsü nung sadema senzütsü atema Constitution-i temeten agütsür ta pai ashi.

Nagaland mesüra North Eastern state tem nung BEFR benoka Inner Line Permits amshir saka item state ajak ya India nung shilem kaka lir. Senso shiai sadema senzütsü temeten angur süra kodaser iba Inner Line Permit ajanga tenokdangba agütsür? ta Prashan Bushan-i asündang.

Iba amai tenokdangba agütsüba ya ozüingi memelar ama nibo bilemer saka Nagaland mesüra North Eastern state temi bendangertem arutsü tenük yoka mitsü atema Inner Line Permits amshibaji tim ta paisa ashi.

Mizoram Assembly-i state official song adopt süogo

Aizawl, August 29, 2026 (Agencies): Mizoram Assembly-i state official song asütsü atema "Ro Min Rel Sak Ang Che" adopt süogo.

"Linük nung state 14 nung pei pei state songs lir aser Mizoram nunga National Anthem aser National Song den meputepba kecha melira state song ka ayuba nung tashishitep kecha mali" ta Chief Minister Lalduhoma-i ashi.

State Cabinet-i August 10 nü senden nung Mizoram nung official state song ka alitsü teletetba agi. Cabinet-i Mizo writer & composer Rokunga ajanga mejemba "Ro Min Rel Sak Ang Che" shimtet.

Iba ken ajanga Tsüngrem ya tematiba yimsüsür aser linüktem

ajak madak tamendakdak tajungtiba aser Chubatem madak Chuba ta sangoktsür ta CM Lalduhoma-i ashi.

"Iba ken ya Tsüngrem dang nungi lenisüba, tekümkükba aser asen lima aser nübortem madak yimsüsütsü meshia sarasademba lir" ta pai ashi.

"Iba ken ajanga asen lima ketdangsübaren nung Tsüngremer yimli amenokdakjang aser mapang tamajungtem aser tayongzükbatem koktettsü atema asenok nem tamang aser tashi agüjangma" ta Lalduhoma-isa ashi.

General Administration Department (GAD) ajanga state song amshiyim indang guidelines

mesüra code metetdaksütsü ta paisa shisem.

Iba ken ya kodang tendir, ajak noktaksüla, teka tachichilen teku abelen nung ayutsüla aser sarasadema atentsüla ta CM Lalduhoma-i ashi.

Rokunga-i 1947 nung "Ro Min Rel Sak Ang Che" (Be Thou our Counsellor) mejem aser telungpur maparen inyakba mapang Mizo National Front (MNF)-i iba ken ya Mizo anthem ta sangdonga liasü.

Iba mapang nungi state anthem ama züngshia aru saka official recognition mangu liasü. 2022 küm MNF sorkar kübok Mizoram sorkar school ajak dang iba ken ya class metenzük dang atentsü tetuyuba agüja liasü.

Seiyhama yimtsüng nung Raja mersü benjung amung



Kohima Luroi/August 29 (TYO): Agusut 29 nü Kohima district kübok Seiyhama yimtsüng nung 4buba Organic Naga King Chilli (Raja Mircha) Festival 2026 mungogo.

Seiyhama nung ya Nagaland nung mersü tashitiba adoker, aser iba ajanga kibongtem rongsenketzüng nung kanga teyari agüja arudar.

Benjung Information and Publicity incharge Kevineizo Zumu-i ashiba agi, yimtsüng nung kibong 482 aliba nungi kibong 180 atema Raja mersü tsünüba ya rongsen aazüksü atema kanga tongtibang lenmang ka kümogo, aser taküm mersü tin 3,200 nungi 3,500 shi aongtsü imlar, aser iba ajanga sen lakh 30 nungi 32 tashi yokzüksü imlar.

Taküm tang tashi nung aluyimertemi Raja mersü tin 1,127 ongogo aser tin shia mersü seret 3.3 shi alir, ta pai

ashiba den, ano mersü tin 1,500 shi aongtsü imlar, anungji ajak senteper taküm mersü tin 3,200 nungi 3,500 shi aongtsü imlar, ta shisem.

Raja mersü tajem yagi sen lakh 30 nungi 32 tsüngda aazüksü imlar aser iba den Raja Mircha pickle nungia sen lakh 1 mesüra 2 bo aazüksü imlar, ta pai ashi.

Benjung mapang Raja mersü ya seret nung sen 300 aser tin nung sen 800 (mersü tazü aser tamen temeyoktep) agi yokogo.

Iba benjung nung Peraciezie Baptist Church, Kohima Pastor Rev Dr Kevichalie Metha alakteta jaoker liasü. O jembiba mapang pai, mersü kanga junga tanga aongba ya Tsüngrem taochi agi lir, ta ashiba den Seiyhama ali tajung asüba aser aluyimertemi kanga meranga inyakba ajanga item temoatsütem angur ta ashi.

Metha-isa, Raja mersü ayokba ajanga kibongtem chiajemtsü, tanurtem school fee agütsütsü aser libalirotsü atema aluyimertem nem teyari agütsür ta ashi.

Pai, Seiyhama ya Kohima district tatemlen lir asünung taoba mapangbo ajaki memeteti liasü, saka kümshia Raja mersü benjung amungba ajanga ajaki meteta kümogo, ta shisem.

Maneni pai, aluyimertemi kanga meranga inyakba atema parnok nem tenüngsang agütsüba den ali temo den meranga inyakba ajanga mersü kanga junga tangteta ongogo, ta ashi

Metha-i, aluyimertem dang parnok takok agi temulung sür dang malitsü tekümdangtsü metetdaksü. Pai parnok dang, parnoki aazükba ya amajok nung melalutsü saka tali ajemalushir maneni meranga inyaktsü ajungshia liasü.

NE Star Ultimate Music Talent Hunt Nagaland audition agiogo



Kohima, Luroi/August 29 (TYO): NE Star- Ultimate Music Talent Hunt atema Nagaland live audition August 28 nü Okusa Toyota showroom, Kohima nung agiogo. Iba sentong atema Toyota-i teyari agütsü aser Unitex Inc-i achaayanga liasü.

NE Star ya Northeast kübok tesem balala nungi sempet aketba kentenertem bushiteta anitetsü asoshi sabang ka lir.

Sentong koba IPRS den sendaktepa lir, iba ajanga NE nung temaba jenjang nung aliba kentenertem anidener.

Audition ya Symphony

Production nungi state coordinator Mele Pucho-i ketdangsüa agia liasü. Sentong ya Femina Miss India Nagaland 2023 Ezhoutou Keyho lenisüba nung kanga takok ngua agiogo.

Sentong nung Vilazeü Kengurüsie aser Kedo nati ken ka aten aser Toyota tenüng nungi SK Karthik-i lokti pela agizükba o jembia liasü.

Tetoktepertem ya local musician temi asadanga liasü. Tetendangertem rongnung School of Music, Kohima Director Ameu Usou Zao aser kentener, ken mejemer aser Divine Connection Frontman Obed Kath na densema liasü.

Sentong ya Unitex Inc nungi Neingulie Nakhro-i tepela o jembir tembanga liasü.

Ghonda 2 live audition agiba mapang Nagaland nungi Top 20 kentenertem sayuogo.

Tetoktepertem rongnungi tajungtiba ana shima state tenüng nung maneni tokteptsü. Kasa tetoktepba ya maneni state tenet nunga agitsü.

Tetoktepba nungi shimertem September 20 nü official NeStar Instagram page ajanga sangdongtsü.

State balala nungi takok angurtem final-i aitsü. Final ya Guwahati nung September 27 nü agitsü.

Dimapur nung mejangjabatasü mangkangutetalir

Dimapur, Luroi/August 29 (TYO): August 29 nü, arishi küm 40 nungi 45 tsüngda asütsü ta bilemba mejangjaba tebur (local) ka tasü mang nguteta aliba indang osang ka Station Master Railway Station Dimapur nungi agizüka liasü.

Osang agizükba sülen ken o bushisüngdangtsü atema duty party iba tesemi oa liasü. Tasü mang dak sendakba nung ken o balala ashishiba sülen nisungba ya train agi menüngset asütsü ta asateta liasü.

Temzüng ozüng dak ajedamker tinyaktsü maparen ajak tembanga inyakba sülen tasü mang ya PM examination/ identification atema District Hospital Dimapur Morgue-i benerogo.

Ken o dak sendakba nung asüsanger kinunger, adianu aser medemertem dang Officer-in-Charge, Govt. Railway Police Station (GRPS), Dimapur (Mobile No. 7085055021) den tongteprateptsü mepeshia metetdaksüogo.

Dimapur nung FILMIT India Workshop agi



Dimapur nung FILMIT India Workshop agiba mapang tangokba noksa angur.

Dimapur, Luroi/August 20 (TYO): Tang mezügbuba INTACH Nagaland Chapter-i ayongzüka August 29 nü Tulip Hall, Duncan Basti nung FILMIT India Workshop 2026 ayongzüka agiogo.

Iba Workshop nung Charis High Academy, Christian Hr. Sec. School, Ram Janaki Hr. Sec. School, The Maple Tree School, Bethesda Hr. Sec. School nungeri shilem agia liasü. Workshop ya INTACH New Delhi nungi team kati achaayanga agi, aser Tuning Fork Films nungi technical experts temi teyari agütsü, shirnoki session balala agiogo.

FILMIT ya multi-cultural project ka lir, koba film tem yanglua lemsatepba ajanga school tanurtem nem sobaliba balala angatetdaksütsü, kati ka asoshi aria bilemtepa

anepaluteptsü asoshi sayutsü nükjiding nung tenzüka lir.

FILMIT-i class 6 nungi 8 tsüngda azüngertem parnok sobaliba indang mobile phone ajanga minute 1-2 indang film tatsü yangludaktsür, koba internet ajanga linük kübok tanga tesem aser linük balala nung school tanurtem den lemsateptetsü.

Sentong nung shilem agirtemi film tatsütsü yanglutsü aser website nung upload asütsü, koba 2027 küm February ita national interschool film festival nung screen asütsü.

INTACH Nagaland Chapter-i iba workshop nung shilem agiba school tem dang kanga pelaba lemsatepogo, aser film ajanga pei senmang kanga junga sayutsü asoshi imlaja ataba kaketshirtem den lemsatepa liasü.

Dimapur nung Joint Council Forum senden amen



Dimapur, Luroi/August 28 (TYO): Colony Council, Churches Colony Council, Middle Point Council, Nyamo Lotha Colony Council aser Khermahal Area Council nunger longjemer August 28 nü Joint Council Forum senden ka ayongzüka menogo. Iba senden nung DCP den Police Stations (West & East PS) ana nungi OC, ACP aser ADCP densema liasü. Senden ya DCP Office, Dimapur nung menogo.

Iba senden ajanga telok anaprongla nem yimti dak sendakba nung parnok tebilemba, tebilemtsütem aser tetsükdaktsü balala lemsateptsü asoshi maongka agütsüogo. Senden nung Dimapur nung

aliba nüburtem teküzmükba kübok toktsütsü, security aser lenla ajak nung nüburtem ajangzükdaktsütsü atema onük balala benoka kanga tajangzük ka-a sensaksemogo.

Telok anapronglai ken o balala nung teka amteper katina nongita yarieptsü aser ajak ajangzüksüsa ken o balala bentettsü asoshi longjemer inyaktsü bendanga agütsür aliba lemsatepogo.

Lokti aser police administration na teka amteper inyakba aruba akangshitsü aser Dimapur yimti ya ajak asoshi talitsü tesem tajungba ka kümdaktsütsü atema maneni longjemer inyaktsü bangjemteper iba senden tembanga liasü.

Nepal nung India nung 88 kümzükogo; 287 mangur: MEA



Nagpur, August 29, 2026: Tzümetsüng lendong atalokba Nepal linük nungi India nung 88 kümzükogo; 287 mangur: MEA

New Delhi, Luroi/August 29

(Agencies): Honibarnü Ministry of External Affairs (MEA)-i, tang tashi nung Nepal nung India nung 88 kümzükogo aser 287 mangur, ta metetdaksü.

Iba dak alia Indian origin 128-a mangur.

August 26 nü Nepal nung ajungben tzümetsüng lendong tulu atalokba sülen Honibar tashi nung nisung 670 asüba jangjaogo, ta osang ka ajanga metetdaksü.

Honibarnü Rasuwa district nung aliba hydropower project nungi India nung 88 kümzükogo aser 287 mangur, ta metetdaksü.

Tasümantem nungi DNA samples tendanga maitsü jangjaba nung yariteptsü atema India nung forensic expert team trok Kathmandu-i yokogo.

Hokolbarnüa India nungi specialised technical team ka Kathmandu tonga ogo.

MEA-isa, Honibarnü India nung 120 China nungi Nepal tongogo, ta metetdaksü.

Teyari nungdabapurtem atema Indian embassy-i emergency helpline numbers- +977 985 131 6807 aser +977 970 910 7500 agütsüogo iba denji külemi special control room ka amenoka teyari nungdabapurtem yaridar.

Delhi-NCR nung CNG seret shia sen 3.89 tuogo

New Delhi, Luroi/August 29 (Agencies): Honibarnep 6:00 ako nungi Delhi-NCR nung CNG seret shia sen 3.89 tuogo aser ibaji ajanga CNG gari kiburtem aser commercial gari kiburtem knga takoksa angutsü.

Jenang atuba sülen Indraprastha Gas Limited-i Delhi nung CNG seret nung sen 86.98 agi ayoker; yamaji Noida, Ghaziabad aser Gurugram nunga jenjang tuogo.

Delhi nung CNG seret ka nung sen 83.09 aliba nungi sen

86.98 kümogo; yamaji Noida nung sen 95.59, Ghaziabad nung sen 95.59, Greater Noida nung sen 95.59 aser Gurugram nung sen 92.01 agi ayoker.

IGL-i ashiba agi, international liquefied natural gas jenjang kanga atuba ajanga CNG jenjang atutsüsa akümer, ta metetdaksü.

Gas jenjang kanga atuba ajanga tang seret shia sen 3.89 atutsüsa akümer, ta parnoki ashi.

Taküm küm kija nunga CNG

aiben asadanga tua liasü. May ita nung Delhi nung IGL-i CNG seret shia sen 2 tua liasü aser May ita nungsa seret shia ano sen kaka atu.

CNG jenjang atuba ya ajanga anogo shia oli-oratsü atema CNG atsükba gari amshirtem aser commercial gari amshirtem takoksa angutsü.

CNG jenjang atuba ajanga commercial gari amshirtemi gari para atutsüsa akümtsü aser ibaji ajanga passenger tem-a kongshitsü.

PM Modi-i Uzbekistan aser Kyrgyzstan na semdangtsü apusoa ogo

New Delhi, August 29

(Agencies): Uzbekistan aser Kyrgyz Republic na semdangtsü atema Ato kilonser Narendra Modi Honibarnü apusoa ogo; pai Uzbekistan Tir Shavkat Mirziyoyev den senden amentsü aser Bishkek nung 26buba Shanghai Cooperation Organisation (SCO) Summit nung shilem agia adentsü.

Uzbekistan Tiri jaokba nung ajemdaker August 29-30 anogotem nung Modi-i iba linük semdang; iba sülen August 31 aser September 1 anogotem nung pa Bishkek-i oa SCO summit nung adentsü.

New Delhi nungi apusoa aotsü lia Modi-i, Central Asia den asalentong tsütsü tesendaktep tajungba akümtsü aser iba region den tesendaktep tajungba akümtsü nükjidong nung pai linük ana semdang, ta metetdaksü.

Tashkent semdangba mapang nung Modi-i Tir Mirziyoyev den senden mena India-Uzbekistan Strategic Partnership tajungba akümtsü atema jembitsü.

Lenir anatisa linük ana tsüngda shishilembaba, investment, digital connectivity, defence, energy, shisaliok aser nüburtem tsüngda amalitep jenjang asadangtsü.

"Shishilembaba, investment, digital connectivity, defence, energy, shisaliok aser nüburtem tsüngda amalitep jenjang tajungba akümtsü atema ni Tir Mirziyoyev den jembitsü aser külem mangdang- Viksit Bharat aser Yangi Uzbekistan ajungkettsütsü atema jembitsü," ta Ato kilonser Modi-i metetdakja liasü.



Narendra Modi

Tang agi pezübenbuba Modi-i Uzbekistan semdang.

Ato kilonserisa Shastri Memorial aser Tashkent State University of Oriental Studies nung aliba Mahatma Gandhi Centre semdangtsü.

Iba sülen Modi-i Bishkek semdanga SCO summit nung adentsü. Kyrgyz Tir Sadyr Zhaparov-i 26buba SCO Summit nung adentsü atema Modi jaoka liasü.

2017 küm nungi India-a SCO nung active member ka kümogo.

Ato kilonseri Tir Zhaparov ajuruba den külemi SCO lenirtem den jurila senden amentsü aser 6buba World Nomad Games tetenzük sentong nung adentsü.

SCO senden nung Russia Tir Vladimir Putin aser China Tir Xi Jinping na densema lenirtem aika adentsü.

SCO nung züngsem linüktem rongnung Russia, China, India, Pakistan, Iran, Central Asia nung aliba linük pezü aser Belarus densema lir.

Plenary session nung Iran Tir Masoud Pezeshkian aser Pakistan Ato kilonser Shehbaz Sharif nata shilem agia adentsü.

Form No. 3
[See Regulation-13(1)(a)]

DEBTS RECOVERY TRIBUNAL GUWAHATI
Suwama Bhawan, House No. 12, New Town Path, Near Hanuman Mandir,
G. S. Road, Ulubari, Guwahati-781007 (Assam)

Case No.: OA/375/2026

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 6457

STATE BANK OF INDIA
-Vs-
M/S GURAS MARKETING & ANR

To,
(1) **M/s Guras Marketing**
Prop: Suraj Rai, Khakhus Building, Church road, District - Dimapur, Nagaland - 797112.
(2) **Mr. Suraj Rai**
Prop: Guras Marketing, Son of Jay Narayan Rai, House No. 31, Nepall Basti, Near Holy Cross School, District - Dimapur, Nagaland-797112

JAKER

29.07.2026 anogo nung Presiding Officer/Registrar matsüngdang **OA/375/2026** benoka liasü

Rs. 3362374.96/- sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaker/ notice agütsür (application den documents copies densema lir).

Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:-

(i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür;

(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;

(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;

(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;

(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.

Nü dang tezüluba nung sangdong applicant nem agütsütsü tuyur aser **09.09.2026** anogo nung anepdang **10:30** ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemteba agütsü.

Paper Book ji iba Url nung reprangang: <https://cis.drt.gov.in/drtlive/paperbook.php?ri=2026474800620>

01.08.2026 anogo nung tsünglanglen kü meyongnem den iba Tribunal indang seal agütsür:

Registrar
Debts Recovery Tribunal, Guwahati



August 29, 2026 nü New Delhi nung Lok Sabha nung opposition lenir, Rahul Gandhi-i osangbenertem senden ka nung jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 30, 2026

Tsüngrem taochi

Alima nung nisung tuluba nungi tilaba tashi, takar aser sensaker ajak Tsüngrem taochi agidang alir. Tsüngrem taochi ajanga asenok ajak iba limai aru aser anogo shia Tsüngrem taochi agi aochizüka asenok lendong aser timtem nungi kümzüka alir. Tsüngrem taochi agi asenok taküm kümzüka aser mapa nung takok angubatem asenoki aiben mejangjatsüa akok, kechiyong asenok anema alidang aser temang nung tashi itta alidang inyaktetba mapatem ajak ya asenoki asenoksasa inyaktet amato bilemer. Asenoki aiben asenoki kenyongi makoktsü ta bilemba mapatem dang Tsüngremi inyaktettsü ta bilemer saka kechisa asenoki asenoksasa Tsüngrem sayatenya tashi tenük agi mengui inyaktetter, itemjibo Tsüngrem medeni asenoksasa asenoki inyaktet ama asenoki bilemer. Ajisüaka, kechisa asenoki inyaktetter, item mapa tilatiba kata asenoki Tsüngrem tashi aser taochi medeni inyaktettsü makok. Tsüngremi maochira asenok taküm aliyonga asenoksasabo jajaa moutettsü, o mejembittettsü, mechiyongtettsü, amui moutettsü aser teboka-süng junga moutettsü. Itemji anogo shia asenoki Tsüngrem tashi medeni inyaktetba ama bilema inyakba mapatem kar lir. Aji oda, Paul taküm nunga Tsüngrem taochi mamatsü atema Tsüngremi pa temang nung timtem ka agütsü ta 2 Korint 12:7 nung shia lir. Paul ya aso tajung, tasü aser tashi tait nisung ka liasü. Pa taküm nung Yisu Khrista agizüker Osang tajung sayutsüngia jasadanga aiben pai pa anemer lokti ajuru saka pai itemji kokteta osang tajung sayutsüngia jaja. Pai Yisu tenüng nung tasür dena shia arudaktsü. Pa ajanga Tsüngrem sayatenya mapa jenti inyak. Ajisüaka, pai item ajakji pa ajungba agi, pa uluba agi aser pa tasü aser tashi aitba agi inyaktetba ama bilem südi. Ashiko, kenkenbo pai sayatenya mapa inyakba aser junga sayutsüngitettba jagi pa asüküma bilema alitsü akok. Ibayongji, Tsüngremi pa temang nung timtem ka agütsü. Ajisüaka Paul-i iba timtem agütsüba nükjidadongji mangatet. Ashiko, pa temang nung timtem alibaji mojingi agütsüba timtem ta bilema aiben mojinga arütsür alitsüa akok. Aji oda, Paul-i pa temang nung timtem alibaji alima atakatam nungi aruba timtemang ka amto bilema Tsüngrem dang taneptsü meshia sarasadem. Pai tangarbo jungtsü aser tasür a shia arudaktsü, saka pa mang nung timtem tilaka alibabo pasasa pai maneptsütet. Idangji dang Paul-i Tsüngrem tashi aser taochi angatet. Temang nung kecha timtem malidangbo peisasa mapa ajak inyaktet amato asüküma bilema liasü saka kodang timtem agi atong, idangji dang Paulia Tsüngrem medeni taküm alitsü makokba tashi aser taochi angatet. Aji oda, asenoki aiben asenok junga ali tashi asenoksasa alir amato bilemer aser timtem arudang Tsüngremi asenok maochir amato bilemer. Ajisüaka, kodang Paul-i Tsüngrem dang pa mang nung timtem aliba anepjang ta asemen tashi mepishi, Tsüngremi ashi, temang nung tashidak liaka, "Kü taochi na asoshi teperi, kechiyong Kü tashijibo tashimait mapang nungang junga meteter." Aji oda, Paul-i idangjidang Tsüngrem taochi tali angtet, anungji nemnemtsü melen pai ashi, " Anungji, Khrista ain kü dak alitsü asoshi ni kanga pelashishia kü mekokmein nung uludi. Aji asünung, Khrista atema mekokmein nung, sensamasatsüba nung, talira timtema inyakba nung, rishikangshi aser lendongtem nung, ni temulung uludi. (2 Koring 12-9-10). Aji oda, asen taküm nunga asen tashi aitba, asen ajungba aser aseni kanga junga inyaktetba mapatem kar alitsüa akok. Ajisüaka, idangji asenok kanga kümdangtsüla, kechiyong itemji Tsüngrem taochi medeni kecha meinyaktet. Aiben asenok Tsüngrem nungi piladaktsüba asen timtem agi masü saka asenok tashi itta alidang ataloker. Aji oda, asenok temang nung mekokmein kar alitsüa akok saka iba jagi Tsüngremi asen dak tali temulung lemtettsüa lira, ibajiang temoatsüba. Asen timtem aser mekokmein mapang menemnemli, kechiyong iba jagi Tsüngrem tashi aser taochi tali tajungba meteter.

OLEMSABANG

ASENOK SADEM-SADEMA MAMANGTETTSÜ MAPANG KA ARUDAR

~ L. Kika Pongener

India lima tesem balala nung mapang shia Christian-tem amokmerenba, reshikangshiba, tenla kidang külema lia amakba, Pastor-tem aser Putir-tem tepsetba; social media sabang balala ajanga mapang shia angazüker. Ajiser, item ama tatalokbatem anema FIR lodge asütsüba Police Station-i aonung Police-i magizükba; meyiper amokmerena merenshiba osang angazüker. Ano BJP-i yimsü asüba State ajak nung 'Anti Conversion Law' yangluba osangtem angazüker. Hindu nung tanga yimsü dangi meyipra ajibo temerenshi tulu aser Jail nung puoktsü; saka Hindu nung tanga yimsü amanga aliba; tanaben Hindu yimsü dangi meyipra; ajibo 'kidangi meyipa shilangba' (Ghar Wapsi)...ta züngshir. Ano State kar nungpo Nashi shi machitsü aser Nashi metepsettsü ozüng yangluba-a angazükogo. Asenok Christian-tem aser Minority-tembo chiyungtsü tashi nung; pei chiyungnuba sadem-sadema mechittettsüa talenba temzüng-ozüng yangluba ngua arudagi.

Ano Uniform Civil Code (UCC) ya-a ozüng küma yanglutsü meranger; iba ya ozüng küma agizükra; Christian-tem dak lenmang aisu nung kongshitsü akok. Ano 25th December Christmas anogo nung 'Good Governance day' amongtsüba ozüng küma yanglutsü merangba-a angazükogo. Ano asen Naga lima nung Deobar Temeshi amungnu Election agiba, Vote azüngba aser Social Work inyaktsü ayongzükba-a ajangshia aruogo. Ano Yoga ya Schools, Colleges aser Institutions ajak nung khangtepa (Compulsory) beshidaktsütsü merangba-a angazükogo. Ano tang 'Vande Mataram' ken ya Schools, Colleges, Institutions, Offices ajak nung khangtepa atentsü ozüng küma agizükogo ta angazüker. Iba 'Vande Mataram' ken ya Hindu nung dak alaka; tanga yimsü amanger atemabo tashishitsü aketba ken ka asütsü. Ano India lima City kar nung; School, College aser Hostel kar nung North-east India nung kaketshir kar nem khangshia (Force) agi 'Jai mataki Jai' aser 'Jai Shree Ram'....ta shidaktsüba aser tashi mangara amokmerena merenshiba-a angazükogo. Iba olong ya Hindu nung tamangba yimsü nung asenok Christian-temi 'Praise the Lord' & 'Haliluya'.... ta ashiba den mesuktepa lir.

Ano tang Christian-tem atema kanga-sa tashishitsü aketba ozüng ka yanglutsü merangbaji....'Foreign Contribution Regulation Amendment' Bill (FCRA) ya lir. Iba 'FCRA Bill' ya ozüng küma agizükra; Christian-tem dak tuluba kongshitsü sudi. Bendang lima nungi senotsü teyari agia sensaker, timtemer aser lajartem yariba (Charity), Hospitals, Rehab Centers, Old Age Homes, Orphanage Homes etc. Item amala atema Bendang lima nungi senotsü teyari aruba lenmang nung tenokdangba alitsü sudi. Ano Churches, Associations, Hospitals, item telok meyong ali-kimong aser ki-o-jen ajak sorkar keti aotsü aser sorkar tazüokba küpok ketdangsua ayutsü....Ibala mesukba talenba ozüngtem kar alitsü akok. Anungji kodang item ajakji ozüng küma agizükdir; Christian-tem atema-bo mission mapa sadema meinyaktettsü aser tetsükdaktsü aika ajurutsü akok.

Küm ana-asem shi suiogo; Assam lima nung Christian-temi taneptsüba mapa (Healing) inyakba nokdangtsü ozüng yangluba-a angazükogo. Ano angazükba agi....RSS teloki North East India State-tem nung Christian-tem Hindu yimsü dangi meyipdaktsütsü; tenuk yoka asa-lentong balala yangluba-a angazüker. Ano India ya 'Hindustan' ta melentsü aser tamangba yimsü ka dang alitsü aser aji 'Hindu' yimsü asütsü ta miim tasa (Hidden Agenda) ka lir ama angazüker. Ashiko, BJP-i aniba sorkar yagi maneni yimsü sua ora; ibaji mapa küma inyaktsü kecha meteta mali. Aji oda, tanem-tanemi christian-tem sadem-sadema mamangtettsüa, mekülemtettsüa, sayutsüng-ia mesutettsüa aser mission mapa-a meinyaktettsüa mapang ka arudagi. Anungji Christian-tem kanga saksalema alitsüla. Ashiko, Naga nung dangipo tangar lima nung ama reshikangshia amokmerena marutsü; saka sen dang bener meszüka arutsü akok....Nenoki Hindu yimsü amangra nisung shia sen merijang / lakh paikaji agütsütsü ta lema arunungpo.... Ashiko, asen Aor tamangertem tamasa meyiptsü ama nukla nung angur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nepal nung Arogotemi tzümetzüng agi kongshibapurtem yarir



August 28, 2026 nü Nuwakot district (Nepal) nung tzümetzüng lendong agi kongshiba nübурtem nem teyari agütsütsü atema renemdang tangokba noksa nung angur.

August 29, 2026: August 26 nü Nepal nung aliba Bhote Koshi ayong nung ajungben tzümetzüng lendong tulu ataloka nisung aika süogo aser noklang aika samaogo.

Tzümetzüng ajanga gari lenmang aser kiojen jenti raksatsü aser tang samabapurtem bushiba mapang nung Nepal nung aliba Arogotemi dang masü saka Khristan melungtet telok aikati tzümetzüng agi kongshiba nübурtem yari tenzükogo.

Nepal nung aliba Arogotem aser International Christian agencies-i chiyungtsü, tzü aser kiojen asüba osettsüset lema agütsüdar.

World Evangelical Alliance-i, tzümetzüng aser anentsüh ajanga Nepal nung Rasuwa district tamajungba kongshi, talisa Timure aser Syabrubesi na nungbo ki aika ponger oadok, lenmang aser apu aika raksaogo, ta metetdaksü.

Timure nung aliba Tenla ki trok nungi Tenla ki anabo tzümetzüng agi ponger oadokogo, ta WEA-isa metetdaksü.

Osang angazükba agi, iba lendong nung tamangertem-a (Khristantem) 125 dak tali

süogo.

Nepal nung National Churches Fellowship of Nepal aser Nepal Christian Society nati linük yimtiba, Kathmandu nung amenoker teyari agütsüba maparen tenzük assessment team asem motorbikes nung lendong atalokba tesemi yokogo aser rescue team kati medical teyari agütsütsü.

Ano Nepal nungsa local Arogotem nungi lenirtemi teyari agütsüba maparen inyaksü atema district-level nung ketdangsertem dang nungi temelaba meshidar.

Nepal Christian Society nungi Rev. Dilli Ram Paudel-i iba lendong nung samaba kibongtem atema sarasademjang, iba denji külemi kümzükb maparen inyakertem, medical workers, Arogotem aser kibongtem atema sarasademjang, ta mepishia metetdaksü.

Iba lendong ajanga tesem aika nung electricity aser mobile network maliba den külemi radio service raksaogo, ta Arogo nung lenirtemi metetdaksü.

Parnokisa, lendong atalokba tesemtem nung gari lenmang shilem 40 bo raksaogo, ta ashi.

US nung aliba Southern

Baptist Convention indang Send Relief teloki, Nepal nung tzümetzüng agi kongshiba district tem nung aliba partner Arogotem den senteper parnoki teyari agütsüba maparen tenzükogo, ta metetdaksü.

Send Relief-i jang, menjang, totzü, metsü, disinfectant, paracetamol mozü, sapon aser süki densema teyari oset aika yokogo, ta metetdaksü.

Item teyari osettemji partner Arogotem nem agütsüba sülen Arogotemi lendong agi kongshiba nübурtem nem lema agütsütsü, ta parnokisa metetdaksü.

Khristan melungtet telok Samaritan's Purse-ia disaster relief specialists team ka Nepal dangi yokogo. Iba team jagi Khristan partners den senteper inyaksü.

Samaritan's Purse-isa chiyungtsü, tarpaulins, blankets, solar milen aser hygiene kits aika tayimtsü ajanga bener otsütsü.

Samaritan's Purse nung Tir, Rev. Franklin Graham-i Facebook ajanga, helicopters amshia nisung aika kümzükdar, ta metetdaksüba den külemi iba lendong ajanga takoksa anguba kibongtem atema sarasademjang, ta metetdaksü.

Longjanglepzük nüngo ken sayaogo



Mokokchung, August 29 (TYO): Merangkong Laishir Telungjem (MLT) ajanga Longjanglepzük Tzüsener küm 175 jongmong nüngtem nung nüngo ken ka August 28, 2026 anogo nung Bethel Prayer

Home, Nuton Bosti Dimapur nung sayaogo, ta MLT Tir Wb. Akumtoshi, Tezülor Wt. Akuminla S aser Programme Committee Convenor Wb Limasangwa nungeri sangdong ka ajanga metetdaksü.

Iba ken ya MLT-i achaayanga Wb. Imna Yaden-i mejemba ken ka lir. Iba ya ajanga tarutsü putu asoshia asen tamangba yimsü Tsüngremer sentong nung koda wazüka ayu, iba kuli tejangja agütsütsü. Iba ken meshitetba aser ken sayaba nüngo kaket MLT ketdangpur meyongnem lia, R. Amenla Imsong, Founder Director, Bethel Prayer Home ajanga inyaka liasü.

Iba ken ajaki angatettsü asoshi <https://youtu.be/6sShn6ptkU?si=0c9YrcuP5qzhSTw> nung agütsür. Iba Tsüngremer taochi asoshi tenüngsang agütsüba sentong Sept. 7, 2026 anogo Merangkong Yim nung agitsü, anungji yimtsür-yimer, anükabang aser temulungertem ajak iba sentong nung adentsü pelashishia jaoker, ta kasa sangdong ajanga metetsaksü.

ANO GO ABEN TSÜNGREM DEN
TSÜNGREM
SENTSÜWANGSHI ASOSHI

"Anungji nenoki "chiyungaka jemaka," kechisarena inyakaka ajakji Tsüngrem sentsüwangshi asoshi inyakang.
~ 1 Korint 10:31

Iba lai o ajanga asenok taküm libaliru ajak ya nükjidong tejangja alitsüla ta Paul-i ajungshir. Asenok anogoshia inyakba mapa, kechi balaka tongtiban masü ama, saka item ajanga nükjidong tuluka atalokdaksütsü akok ta maneni ayongzüker.

Yangerba ta sür noksa yanglur (painter) ka, pa indang studio nung noksa ka yanglua alidang, medemer kadi pa dang nai kechi asüba agi iba mapa ya inyaker ta asündang. Idangji pai langzü, 'ni kü mapa aser ni yangluba noksa nung ya Tsüngremi yangluba alima tobur ajungba indang sayunür. Noksa ajak nung ni Tsüngrem nem aküm aser tetushi agütsünür' ta pai langzü. Pai sentsü (color) tapu balala amshia noksa yangludang, ibaji pa sempet ajungba indang dang masu, saka Tsüngrem nem sentsüwangshi bener arutsüba indang kuli asü.

Yamaji asenoka kechi inyakdir inyakaka Tsüngrem nem sentsüwangshi bener arutsütsü koka lir. Office mapa nung süshia, kidang kinunger anepaludang süshia, aseni jangraba mapa kar inyakdang süshia, asenoki itemji Tsüngrem külemba aser pa sentsüwangshitaktsüba mapa ta agizüktet. Kodang aseni anogo shia mapa inyakba ya Tsüngrem asoshi ta angateter, aseni inyakba ajak nung nükjidong tajung reprangtettsü.

SARASADEM:
Kibuba, mapang aser mapa ajak nung ni Ne Nüng sentsüwangshitsü yariangma. Amen

Vietnam nung pastor ka küm tenet ser tesadang jail nung puoktsü

August 29, 2026: Vietnam tentetsang Pastor A Ga ket kübok Central Highlands nung nungi senotsü ngua liasü, ta lisopur pastor ka küm tenet ser tesadang tepuokdak ayutsü obendang agütsüogo.

Dak Lak province nung People's Court-i arrshi küm 59, Pastor Y Nuen Ayun jail nung puoktsü obendang agütsü. Pastor Nuen ya Ede lisopur lir. Ede nunger nütsüng shilem 30-40 bo Khristantem lir.

Nuen Ayun atema ken o jembitsür, Ha Huy Son-i, ghonda ana shi ken o angadanga mapang nung okadak pastor kinüngtsü aser par chirnurtem-a liasü, ta ashi.

Yaküm October 7 nü pastor Nuen Ayun par kidang lia apuba sülen ketdangsertemi, Ayun-i linük security anema inyaksü atema Central Highlands Protestant Church of Christ tim masüba nung amshi, ta tai tonglokja liasü.

Pastor Ayun-i iba Arogo

bo tang US nung lir.

Sorkar kübok malitsü aser tesüsabo temeja state ka tentettsü nükjidong nung pastor Ayun-i inyaker, ta pa nem tai tonglokja liasü.

2023 küm Dak Lak ketdangsertemia pastor Ga kasa ken o nung aija liasü.

Ayun atema ken o jembitsüsang Son-ibo, Arogo ka tentetba, züngsemtem tanela nung anitetba, online ajanga tekülem sentong ayongzüka agiba aser tekülem sentong ayongzüka agibaji sorkar anema nokdaksü atema asalentong ka masü, ta metetdakja liasü.

Arogoia sangdong ka ajanga, Nuen Ayun tepuokdak ayuba ya Arogo nung züngsemtem amokmerentsü aser Khristan yimsü toktsüdaksütsü atema amokmerenba lir, ta ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züsen

(v) ali nung chiyongtsü adokdaksütsü inyakba (cultivate to produce food)

* Ali nung züsen chiyongtsü asoshi Tsüngremi asenok nem nungloksü.

Züsentet

(adv) alu nung chiyongtsü adokdaksütetba (grown and produced food)

* Aluyimertemi alu nung aonsutsü aika züsentet.

OLONG PAITEP # 76034

1			2			3		4	
			5		6		7		
8									
			9						
	10								
								11	12
			13				14		
15						16			

TIPIEN

1. Anenzükak ki
3. Asür mangyimba
5. Temulung nung shisadang
8. T ____ lu
10. Takdang temalen
11. Tesa ____ a
13. Ajungbena temulungjang
- tongtonglatsü atu
15. Tejen lai nung tesayur
16. Tsüngsak-mopung

LANGTSÜNGLEN

1. Reprangdaksü
2. ____ ur
4. Kiojen yangludak
6. ____ ait
7. Nagaland nung ayong ka
9. Küm kasa purtem
10. Tetsüing tajemtdak
12. ____ adenshi
14. Tsünüsenbongtsü adokdak

OLONG PAITEP # 76033 TELANGZÜBA**TIPIEN :**

2. Anükalem, 5. Mesak,
6. Apet, 3. Meimtep, 12. Posü,
13. Tajak, 14. Tekettsü.

LANGTSÜNGLEN :

1. Semdang, 2. Ayak,
3. Leptep, 4. Mat, 7. Nati,
8. Yiar, 9. Sangken, 10. Metsük,
11. Mazü, 12. Put.

NAI-A YA METETTER

Alima nung nüngtugu country kentener asür Dolly Parton-i Guinness World Records 11 yangluteta lir. "Queen of Country" ta ajar Dolly Parton mapang tatsüka cancer agi shiranga arur August 25, 2026 nü alima nungi pilaogo.

Guinness World Records

- # Most consecutive decades with Top 10 album entries on the Billboard country chart (female).
- # Longest span of No.1 hits on the US Top Country Albums chart (female).
- # Most decades with a Top 20 hit on the US Hot Country Songs chart.
- # Most Top 10 entries on the US Top Country Albums chart (female) - 49
- # Most studio albums released by a female country singer - 66
- # First country singer to be nominated for the EGOT
- # Longest span of No.1 hits on the US Hot Country Songs chart - 35 years 26 days
- # Most Grammy nominations for a female country artist - 51
- # Most hits on the US Hot Country Songs chart by a female artist - 113
- # Most decades on the US Hot Country Songs chart (female) - 7
- # Most No.1 hits on the US Hot Country Songs chart by a female artist - 25

**CM Conrad-i Netaji indang kürakyanglu raksaba reprangdang**

Shillong, August 29, 2026

(Agencies): Meghalaya Chief Minister Conrad K. Sangma-i August 29 nü Rynjah nung R.R. Colony semdangogo.

Tawa Khasi Students' Union (KSU)-i lungkak aitba sentong ka ayonga agidang Netaji Subhas Chandra Bose indang kürakyanglu ka raksatsü aser tanü

CM Conrad-i non-tribal pur den ajurutepa sensaksemogo.

Conrad Sangma-i kürakyanglu raksatsüba reprangdang aser iba tesem nung alirtem den ajurutepa parnok tebilembatem angadanga liasü.

KSU-i Shillong nung black-flag motorcycle rally ayonga agidang tesem aika nung ozüing

alema inyaksangshiba aser raksatsüba osangtem lir.

Iba mapang Chief Minister Conrad-i kürakyanglu yanglushitsü nangzük aser restoration work atema Rs 5 lakh lemozüksü.

Shillong aser Meghalaya nung tensa raksatsü, teputep malitsü aser telongjem raksatsü inyaksangshi kecha state sorkari magizüker ta paisa nenshia ashi.

Netaji Subhas Chandra Bose-i Shillong den otsüsütsü asüsüsa tesentaktep tajung liasü. Pai 1927 küm mezüing atema Shillong semdang aser Indian National Congress president inyakdang 1938 nunga tanaben semdanga liasü.

R.R. Colony nung Netaji Subhas Chandra Bose indang kürakyanglu ya pa tasoba anogomung tenüing nung January 23, 2023 nü sayaa liasü.

2024 nungi Mizoram-i ILPs lakh 5 shi agütsüogo

Aizawl, August 29, 2026

(Agencies): Sairang railway line, a minister told the state Assembly on Thursday. Mizoram sorkari 2024 nungi tenzüker Inner Line Permits (ILPs) 4,94,033 agütsüogo. Iba nung Bairabi-Sairang railway line lapokba sülen September 2025 aser July 2026 tsüingda permits 2,15,946 agütsüba dena lir.

Mizoram nung tangalen nungi non-tribal nisung 13,730 arua lir aser permits tejangja bener mapa inyakdar ta Home Minister K. Sapdanga-i assembly nung

metetdaksü.

Sorkarisa Mizoram telungi permits shitak bener marurtem anema mapa tuluba inyaksü tenzükogo ta Sapdanga-isa ashi.

Taküm ILPs mesüra valid travel permits malir nisung 934 tashi puogo ta pai ashi.

ILPs mapang temer Mizoram nung lia apurtem Eastern Bengal Frontier Regulation (EBFR) Act, 1873 kübok police station balala nung ken o benoker ta paisa shisem.

Item ken o tem District Court dangi abener aser parnoki

aibelener dang senchi achitsü mesüra state nungi meyipa yoktsü telemtetba agir ta Home Minister Sapdanga-isa ashi.

Mizoram dena protected areas telungi aitsü atema India sensotem nem official travel document ILP agütsür.

ILP ya Bengal Eastern Frontier Regulation, 1873 nung ajemdaker agütsür aser iba ya British sorkari 1875 nung sangdongba lir.

Non-state residents, talisa non-tribal nisungtemi Mizoram telungi aitsü atema ILP nüngdaker.

Guwahati-Delhi rail lenmang ulushitsü; Bangkok den sendakteptsü

Guwahati, August 29, 2026

(Agencies): Guwahati aser Delhi tsüingda railway lenmang four tracks küma ulushitsü aser iba ajanga passenger aser freight connectivity tajungba akümtsü ta Assam Chief Minister Himanta Biswa Sarma-i ashi.

Linük nung railway tracks tenet tashi four-track corridors melentsü atema mapa inyakdar. Saraighat nung Brahmaputra madak railway bridge tanabuba

yakta tenzüksü ta pai ashi.

Railway network ulushiba ajanga iba lenmang nung passenger aser freight trains teimba akümtsü ta CM Sarma-isa metetdaksü.

Iba ya Assam nung rail connectivity atema kanga tongtipang lir kechiyong state-i linük yimtiba aser tanga tesemtem den tesentaktep akangshinür ta paisa shisem.

CM Sarma-isa October 27

nungi Guwahati-i Bangkok den indangindanga sendakteptsüba osang lemsatop.

IndiGo tayimtsütem senzütsü aser iba international connection tasen ajanga Assam nungi Southeast Asia tashi lenmang tanga ka lapoktsü aser tourism, trade & travel ajungkettsü ta CM Sarma-i ashi.

"Guwahati nungi talila bendenloker. Dubai aser Abu Dhabi sülen Bangkok" ta pai metetdaksü.



Pasighat Airport anasa Hotel Airport View nung Arunachal Pradesh nung züngsem pungu agi akümba Kongkura:yo kentener teloki "Toma Dulamang" ta ser Adi music video ka sayadang agiba noksa angur. Iba music video ya Tapang Jamoh-i küm 40 tejakdang züluba Adi Donyi-Polo hymn tanü putu den apet atenba lir. Rural Development and Panchayati Raj Minister Ojing Tasing-i music video sayatsü aser iba sentong nung Ma Ke chairperson Joya Tasung Moyong, Adi Agom Kebang President Bodong Yirang, General Secretary Taging Taki aser tanga tongtipang nisungtem aden.

Russia-i Kyiv anasa warehouse ka amak; nisung 27 tepset



Ukraine yimtiba Kyiv tezülen Russia-i drone agi amakba tesem ka süia nüburtem aoba noksa nung angur.

Luroi/August 29, 2026 (Agencies):

Russia-i Ukraine yimtiba tezülen Bucha district nung warehouse ka amakba sülen nisung 27 tepsetogo, ta ketdangsürtemi metetdaksü. "Tia maka nisung 27 asübabo jangjaogo, aser timba akümtsü akok," ta Kyiv regional governor Tymur Tkachenko-i Honibarnü ashi. Asürtem rongnung Dmytrivska yimtsüng mayor Taras Didych densema lir, ta Tkachenko-i ashi. Russia indang drone kati Kyiv anüolen injang yua aliba warehouse ka amakba sülen iba tesem kanga mejungi apok, ta ketdangsürtemi Honibarnü ashi. Local regional military ad-

ministration tekolakba Tymur Tkachenko-i ashiba agi, iba tesem amakba mapang nisung aliba ki 50 shi raksaogo. Iba warehouse nung tapoktsü oset rezünga yua liasü asütsü südi, ta Ukraine nunger prosecu- tor temi ashi. Parnokisa ken o bushisüngdangtsü ta shiogo. Prosecutor indang office ajanga ashiba agi, iba enterprise indang warehouse nung tapoktsü oset rezünga ayutsü atema temzüng ozüng kübok temelaba agüja aliba mali aji bushisüngdangtsü aser iba company ket nung tenüngdakba permit mesüra temelaba ali mali ajia asadangtsü. Kasa mapang nung Ukraine

tir Volodymyr Zelenskyy-i, Myla yimtsüng nung warehouse ka makogo, ta ashi. Pai iba ware- house indang osang tejangja magütsü, saka ken o bushisüngdangtsü ta shiogo. "Nisung aliba ki anasa injang balala rezünga mayutsüla," ta Zelenskyy-i ashi. Russia aser Ukraine napronglai tawa drone aser mis- sile amshia facility balala maka arudar aser iba mapang civilian tem asüba tali küma odar. Telegram messaging app ajnga Kyiv indang regional gov- ernor-i ashiba agi, iba lendong nung nisunjg 42 yiru aser nisung 380 dak tema lendong atalokba tesem nungi aninogo.

Tuareg telungpurtemi Mali nunger sepai 60 shi chiokogo

Bamako, Luroi/August 29 (Agencies): Tuareg telungpurtemi parnok lenir Inkinane Ag Attaher melena Mali nunger sepai 60 shi chiokogo. Attaher ya Mali army office ka liasü, ta security source balalai metetdaksü. Ag Attaher ya Tuareg-i aniba Azawad Liberation Front (FLA) nung tongtiban lenir ka liasü. Pa ya 2025 küm Niger- Nigeria arrtsü anasa Nigeria security force temi apu. Pa ya Mali amaktsü, drone training agütsütsü asoshi sentong yangluba aser linük balala den tongteprateper ka ama inyaksangshiba atema aija liasü. "Inkinane Ag Attaher aser JNIM [Jama'at Nusrat al-Islam wal-Muslimin] den sendaka aliba nisung kar den melenteptsü atema sepai 60 shi yashi (Brehostibarnü) Niger-i yokogo," ta Mali security source kati AFP news agency dang ashi. Iba tenangzükepba ya Niger sorkari indang indanga achaayanga liasü, ta tanga security source kati ashi. FLA otongdar Mohamed El Maouloud Ramadane-i Facebook nung post ka ajanga Ag Attaher chiokba ya pelashishia agizükogo. Al-Qaeda den sendaka aliba

teloktem aser Tuareg telungpurtemi northern Mali nung apuba sepaitem chioka aruba nung tang sepai 60 shi chiokba ya shilem ka lir, kong Russia nunger mercenaries tem densema lir. Tuareg telungpurtemi ashiba agi, Mali nung tepuokdak yua aliba parnok züngsemta kar chiokogo. Mali nungi source balalai Al Jazeera dang ashiba agi, sepaitem chiokdaksütsü atema Algeria-i teyari agüja arudar. Regional security dak sendakba nung mangatettep kar aliba ajanga tensa mejungi akümba sülen Algiers sorkar den temaba jenjang nung sensaksem tanaben amenokshitsü atema Mali Ato Kilonser General Abdoulaye Maiga-i Hombarnü Algiers semdangogo. Bamako-i, parnoki kiralongrar ta ajaba teloktem den sensak masemtsü ta shiogo, saka sepaitem chiokba ajanga telungpurtem den maneni tongtepratepa aliba sayur. JNIM aser FLA nati April 25 nü Bamako airport aser tanga tesem balala amakba nangzükogo. Iba anogo De- fence Minister Sadio Camara, Kati nung par kidang tepseta liasü.

Nepal aser China nati teküzmükba maparen tenzükshiogo



Tibet kübok Gyirong county, Shigatse nung Gyirong Port leni aoba lenmang excavator aser loader tem amshia yanglushiba noksa nung angur.

Nuwakot, Luroi/August 29: Nepal-Tibet arrtsü nung tzümetsüng agi kongshir aliba tesem nung teküzmükba maparen tenzükshiogo. Tzümetsüng taneben arushitsü ako ta tsübua bilemba ajanga teküzmükba maparen ya khien atema anena liasü. Iba tzümetsüng lendong nung asür 633 jungogo aser samar alirtem 3000 tera agi dang majung kümogo. Nepal indang police-i Honibarnü sangdong ka ajanga ashiba agi, iba lendong nung asür nisung 626 jungogo. Linük disaster authority-i ashiba agi, iba tzümetsüng lendong nung Nepal tsütsü

nisung 2,426 samar bushidar aser item rongnung nisung 517 bo bendangertem lir, kong alima penzüertem aser bendanger mapa inyaktertem densema alitsü akok. Kasa mapang nung China nunger ketdangsürtemia, Tibet nung asür nisung tenet agi timba kümogo aser nisung 554 samar bushidar, ta ashi. Al Jazeera osangbener Minelle Fernandez-i Nepal yimtiba Kathmandu nungi ashiba agi, sorkari teküzmükba maparen nung tawa aliba süngdaksütsü atema India aser China na dang mongintem teyari meshiogo. Item team tem ya Honibarnübo tonga

arutsü imlar, kong tunnel nung sabanga alirtem kümzüktsü atema mongintem densema lir. "Nepal foreign ministry otongdari ashiba agi, iba inyakyimya ya nisung taküm kümzüktsüba dak sendaka lir aser aritepa inyaktsü nüngdaker, ibayongji iba telemtetba ya agiogo," ta laisa shisem. "Nepal-i mezüngbo teyari kecha menügdaker ta ashi, kechiyong parnoki team tem aika adenshia tesem balala nung inyakba ajanga mepetmesü adokba ya maginer," ta lai ashi. Iba lendong ya Bodhbar anepdang tenzüka liasü.

Himalaya tenem nung meter 5,200 shi tur glacier ka chirepa meter 1,200 shi nonger alu aser iba mapang long aser jana balala nonger alua Lende ayong nongbanga liasü. Iba ajanga Nepal kübok Rasuwa, Nuwakot aser Dhading districts kübok tesem balala aponger ao aser mapang ka nungbo Trishuli ayong ya minute 30 tsüngda meter 9 tashi metsünga liasü. US Geological Survey-i mezüngbo iba ya menoknok ka anokba ajanga atalok ta ashi, saka mapang tatsüka lir anentsüh aluba ajanga seismic signal ya agüja liasü ta ashi. Glacier chirepba tesem nung ano awatzüng ka aküm aser mapang tatsüka lir tzü timba küma ao, iba ajanga tzümetsüng tanaben alushitsü akok ta tsübua bilema teküzmükba maparen sota ata liasü. Ajisiüaka ken o asadanga lendong ya mekoktettsüsabo masütsü ta jangja akümba sülen teküzmükba maparen tenzükogo. India, UN, Red Cross Fed- eration, Australia, South Korea aser US nunger teyari balala agütsüogo. Ketdangsürtemi ashiba agi, lendong nung asürtem timba küma aotsü akok, kechiyong tesem aika lishi agi mobanger aliba aser lenmang raksar aliba ajanga tao mejungi lir. Kasa mapang nung Nepal

Finance Minister Swarnim Wagle-i Honibarnü Reuters dang ashiba agi, tzümetsüng ajanga raksatsüba yanglushitsü atema USD billion 4 nungi 5 shi nüngdaksü, koba linük economy tershi lir. "Ken o asadangba sülen USD billion 4-5 nüngdaksü ta asatetogo, saka iba ya tejangjabo memetet. 2015 küm menoknok sülen nüngdakba dang nungibo ishba nüngdaksü. Teraksatsüba balala adokba asadangdar," ta Wagle-i ashi. Wagle-i, kiojen aser facility balala yanglushitsü atema 2015 küm menoknok sülen USD bil- lion 9 entokba dang nung kechiba tang sen ishiba entoktsü iba indang osang tejangja magütsü. 2015 küm 7.8 magnitude tesashi menoknok agi Nepal anokshitsüba sülen nisung 9000 jungnüa asü aser ki million tesadang ka dak tema raksatsü aser Nepal indang economy asemsü shi takoksa ajangshia liasü. Bodhbarnü tzümetsüng ajanga teraksatsüba bener arutsü ajanga bendanglen mapang inyaktertemi sen yokba, tourism aser hydropower dak metaloker aliba economy dak kanga mejungi kongshiogo. Iba tzümetsüng yagi power project tem kanga mejungi raksatsüogo. Item power project tem indang generating capacity ya shilem 12 dak tema lir.

Liverpool-i Barcola atema £123m agütsütsü mulunga agizükogo



Bradley Barcola

Luroi/August 29, 2026

(Agencies): Liverpool-i Paris St-Germain forward Bradley Barcola atema pound million 123 agütsütsü mulunga agizükogo.

PSG-i mezüngbo France nunger asayar atema ya pound million 145 meshi, saka Liverpool puri pa atema mezüng pound million 106 aser add-ons pound million 17 agütsütsü mulunga agizükogo.

Arishi küm 23 tain asayar ya Anfield nung mapang talangka atema tenangzüktepba meyanglu tsüngda iba hopta temang tendangtsü imlar.

Right-footed Barcola yagi left wing nung asayaner aser pa aruba ajanga Liverpool nung Cody Gakpo tarutsü mejangjai

kümogo.

Source balala ajanga BBC Sport dang ashiba agi, Tottenham Hotspur aser Manchester City napronglai Netherlands nunger forward ya alizüktsü atema tejangraba aliba sayuogo.

Kasa mapang nung Liverpool pur ano right winger ka bushiba mapang lir. Parnoki Brighton nungi Yankuba Minteh aser Crystal Palace nungi Ismaila Sarr nabo asadangogo.

Luis Diaz aser Mohamed Salah nati club toktsüba sülen attack akangshitsü atema Liverpool puri Barcola alizüktsü atema inyaka aruogo.

Pa 2023 küm Lyon nungi PSG nung pound million 38.5 agi aden aser iba sülen pai Ligue 1

titles asem, Champions Leagues ana, French Cup ana, Uefa Super Cup aser Fifa Intercontinental Cup kokogo.

Barcola, shibai taküm World Cup nung France atema goal asem idakja liasü, pai tachichilen aser teyong nunga asayateter asünung pai Alexander Isak nema teyari agütsütettsü aser Hugo Ekitike yirur aliba mapang pa melena-a asayatettsü.

Honibarnü Nottingham Forest nung masaya tsüngda osangbenertem den jembiba mapang Liverpool coach Andoni Iraola dang Gakpo tarutsü indang asüngdangba mapang, pai kecha shia matettsü ta ashi, saka arishi küm 27 tain asayar ya maneni club nungi asayadaksüner ta shisem.

Neeraj Chopra Asian Games nung masayatsü



Neeraj Chopra

Luroi/August 29, 2026

(Agencies): India nunger nüngtugu javelin throw asayar Neeraj Chopra ligament yiruba sülen Asian Games nung masayatettsüsa kümogo, koba Japan nung taruba ita asayatsü lir. Iba dak alia pa Diamond League final aser mezüngbuba World Athletics Ultimate Championships (Budapest) nung masayatettsü.

Sports Ministry-i iba ita tetenzüklen Asian Games

atema sangdongba asayar 492 rongnung Chopra-a densema liasü.

"Mapa tatsüka kanga meranga inyaka sülen ni junga asayar ama bilema liasü aser Lausanne nung kanga junga asayaba sülen tanungba asayamungtem asayatsü yongya liasü," ta Chopra-i ashi.

"Tia maka ni training agiba mapang ligament yiruogo. Kü doctor aser team den sensak asema sülen ni

season nung tanungba asayamungtem masayatsü telemtetba agiogo," ta pai shisem.

Chopra, shibai tawa Glasgow nung Commonwealth Games silver medal ngua liasü, pa teberem yiruba ajanga 2025 küm September ita nungi masayai lir Doha Diamond League nungi asayashi tenzüka liasü.

Chopra, shibai Olympic nung medal ana tashi ngur lir, pa taküm Diamond League meet pongu nungi asem nung masaya, kong tatemsa Zurich nung asayaba densema lir.

Ajisüaka arishi küm 28 tain asayar ya Diamond League javelin throw rankings nung point 12 ngua trokbuba nung tembang, aser taküm league ana nung dang asayaka asayar trok asayatsü aliba final atema qualify süatoker liasü.

Pai taküm Lausanne Diamond League nung tajungba asayateta nület meter 88.5 atsü aser Sri Lanka nunger asayar Rumesh Pathirage sülen tanabuba jenjang nung tembanga liasü.

Chelsea striker Nicolas Jackson Aston Villa nung denogo

Luroi/August 29, 2026

(Agencies): Aston Villa-i Senegal nunger striker Nicolas Jackson Chelsea nungi pound million 65 agi alizükogo, koba club-i sen tasaktiba agi asayar ka alizükba asütsü.

Jackson-i Europa League koker aliba team den ya küm pongu atema tenangzüktepba yangluogo, aser pa club nung Villa manager Unai Emery den tanaben longjemogo. Tena Villarreal nunga külemi inyaka liasü.

Hokolbarnü osangbenertem den sensaksema mapang Emery-i, arishi küm 25 tain asayar ya club nung adentsü lir ta metetdakja liasü.

Jackson shiba taoba season loan nung oa Bayern Munich nungi asaya liasü, pai Ollie Watkins melentsü, shiba Saudi Arabian club Al Hilal-i aotsü atema jembishinüba mapang ka lir.

Jackson ya Chelsea indang squad den masü saka balaka training agia liasü, kechiyong pa Chelsea coach Xabi Alonso indang sentong nung densema

mali ta shiatoker liasü.

2023 küm club nung adenba sülen Chelsea nungi 81 ben asayaba mapang pai goal 30 idaktsüogo. Club-i UEFA Conference League aser Club World Cup akokba mapang pai teyari agütsüogo.

Jackson ya taoba season-a Chelsea manager Enzo Maresca-i masayadaksü liasü.

Taoba season Bayern Munich-i loan nung oa asayaba mapang pai goal 11 idaktsü aser Bundesliga o German Cup na koka liasü. Pa Senegal team nungia 37 ben asayaogo aser pa 2022 aser 2026 World Cup squad nunga densema liasü.

Ezri Konsa, Morgan Rogers, Youri Tielemans aser Lucas Digne nungeri Villa Park toktsüba sülen Watkins-a club toktsütsü ana nung lir.

Arishi küm 30 tain asayar shiba club nungi Premier League nung goal timtiba idaktsüba asayar lir, pa Saudi Arabia-i aotsü atema jembishinüba aliba mapang pai taoba hopta Brighton goal 4-0 agi akokba asaya nung asayatsü memulungi liasü.

Tetsür Hockey team nem HI-i senpet sen lakh 50 agütsütsü



Luroi/August 29, 2026

(Agencies): FIH Hockey World Cup nung otsüsütsüsa jenjang pongububa nung tembangba sülen Hockey India-i tetsür hockey team nem senpet sen lakh 50 agütsütsü ta sangdongogo.

Salima Tete aser lar team-i Amstelveen nung World Cup nung 5th/6th place classification asaya nung World No. 5 Germany goal 3-1 agi koka 1974 küm sülen World Cup ka nung jenjang tajungtiba nung tembangba sülen anogo ka lir iba senpet agütsütsüba ya Hokolbarnü sangdonga liasü.

India team taküm World Cup nung pongububa nung tembangba ya 1974 küm iba asayamung mezüng asayaba mapang jenjang pezübuba nung asayamung tembangba sülen küm 52 lir jenjang tajungtiba nung tembangba liasü.

Iba asayamung nung India team-i parnok dang nungi temaba jenjang nung aliba team tem den kanga junga asayateta

asaya ka nung dang tamakok ngua liasü. Parnok China, England aser Australia den draw asü aser South Africa goal 6-1 agi koka liasü. Iba sülen tatembanbuba asaya nung parnoki Germany kokogo.

Hockey India tir Dilip Tirkey-i iba asayamung nung team-i kanga junga asayaba atema parnok nem tenüngsang agütsüogo. "India tetsür hocket team atema iba ya otsüsütsü mapang ka lir. Küm 52 lir World Cup ka nung jenjang pongububa nung tembangba ajanga arenzüka tanen makai meranga inyaka aser team dak meranga tokteptsü tanüla aliba sayur, koba asayamung tepeyong iba team yagi sayuogo," ta pai ashi.

"Hocket India tenüng nung tepelaba temaitsü team nem senpet sen lakh 50 agütsütsü telemtetba agiba pelashishia sangdonger, aser iba ajanga asayartem maneni kanga junga asayatsü asoshi ajungmesotsü imlar," ta pai shisem.

BILEMDANGANG

"Aremzüka atatsü temela masü, saka takokji aremzüka atar meyong."